

Date – 14/12/2025

Time - 7:30 -7:40 Hrs

AKASHVANI AIZAWL

## REGIONAL NEWS BULLETIN

### HEADLINES (MORNING)

1. Mizorama kohhran lian Presbyterian inkhawmpui sang Synod chuan Sethawna awm Jordan Center chu lak a tha an ti a, rorel inkhawmin an pawm.
2. Union Minister of Ports, Shipping and Waterways Pu Sarbananda Sonowal chuan Mizoramah luidunga inkalpawhna tha a awm theih nan Mizoram lui lian 3-ah hmalak a ni dawn tih a sawi.
3. Sainik Welfare and Resettlement chhinchhiah danin, Mizoram chhungah sipai bang 6355 an awm mek.
4. Prime Minister Narendra Modi chuan naktuk aṅanga Thawhlehi thleng hian King Abdullah II bin Al Hussein sawmna angin Jordan ram a tlawh dawn.

<><><>

### MIZORAM SYNOD

Mizorama kohhran lian Presbyterian inkhawmpui sang Synod chuan Sethawna awm Jordan Center chu lak a tha an ti a, rorel inkhawmin an pawm.

Ruihhlo ngaite enkawl na hmun Jordan Centre hi sorkarin a enkawl thin a , nikum June thla khan Chief Minister Pu Lalduhoma hoa Council of Minister thukhawm chuan midang kuta hlan chhawn an remti a, kumin June thla khan Social Welfare Department chuan Jordan Center enkawl chungchangah hian Mizoram Synod a lo dawr tawh a ni.

Synod Executive Committee (SEC) chuan Jordan Center chungchang hi a ngaihtuah a, tun tum inkhawmpuih hian chhawpchuah niin Jordan Center lak hi rorel palaite chuan tha an ti a, a bawhzui turin SEC an ti a ni.

Social Welfare Minister Pi Lalrinpuii chuan, nimirin khan Social Media kaltlangin Synod-in Jordan Centre a lak tur thu hi a tarlang zui ve nghal bawk.

Synod Inkhawmpui hi kum 2010 atang khan Bial-in an thleng tan a, kumin 2025 hian Dawrpui Pastor Bialin Zarkawt Kohhran Biak Inah an thleng a ni. Inkhawmpui 2025-ah hian rorel palai mi 2109 an kal a. Palai thlan mi 1264 leh palai ni sa mi 845 an ni.

Vawiin chawhma hi Pastor nemngheh leh Pro. Pastor ruat inkhawm a ni ang a. Chawhnu-ah Lalpa Zanriah Sakramen inkhawm niin, zan Inkhawmah Moderator valedictory sermon ngaihthlak a ni bawk ang.

Synod Inkhawmpui vawi 103-na chu Chanmari Pastor Bialin Chanmari Kohhran Biak Inah an thleng dawn a ni.

<><><>

## INLAND WATERWAYS

Union Minister of Ports, Shipping and Waterways Pu Sarbananda Sonowal chuan Mizoramah luidunga inkalpawhna tha a awm theih nan Mizoram lui lian 3-ah hmalak a ni dawn tih a sawi.

India Maritime Week 2025 puala hun hmanah Inland Waterways Authority of India (IWAI) leh Assam sawrkar bakah private company ten luidunga inkalpawhna tih hmasawanna tur project atana thawhdunna MoU an ziahna ah he thu hi sawiin Union Minister chuan Mizoram chu hmarchhak bial luidung hmasawanna ah a tel ve tih sawiin hei hian danglamna nasa tak a thlen dawn tih a sawi.

Minister chuan Mizoram luidung zingah Tlawng lui leh Chhimtuipui chu zirchian mek a ni tih sawiin hmanraw bun nan Tlawng luiah cheng nuai 89 leh Chhimtuipuiah cheng vaibelchhe 1.42 ruahman a ni a ti a, Lunglei district-a Khawthlangtuipui leh Tuichawng inkar inkalpawhna-ah cheng vaibelchhe 9.82 ruahman a ni a ti a, he project hian lawng chawlhna hmun lian lo chi pahnih a huam tel dawn a ni.

Minister chuan luidunga inkalpawhna chuan ram thenawm te nena insumdawn tawna kawng lian zawk a hawn dawn a ti a, India in luidunga inkalpawhna tih hmasawn kawngah hmarchhak chuan hmun pawimawh tak a chang tih sawiin tualchhung eizawna kawngah pawh hmasawna tam tak a thlen dawn a ti a, kawng hrang hrangin heng biala mi cheng te tan hamthatna a awm phah dawn tih a sawi bawk.

Union Minister hian a department chanah Review Meeting neiin hetah hian hmarchhak biala tunhnaia project lian hrang hrang 15 an thawh tur tarlan a ni a, heng zingah hian Mizoramah project 3 awmin a dang hi hmarchhak state hrang hrangah thawh tur a ni ang.

Inland Waterways Authority of India leh Heritage River Journeys Pvt. Ltd. inremna ah hian luidung inkalpawhna tih hmasawn bakah heng biala luidung bula mi cheng hrang hrang chhawr tangkai tur ngaihtuah sak te a ni a, zin mi te hmuh nuam tur hrang hrang chhawp chhuah te ani bawk.

<><><>

## SOCIAL WORK

Nimin khan Champhai District chhunga Sesih khaw Branch Mizo Hmeichhe Insuihkhawm Pawl (MHIP) te chuan an member pui, Pi Langkhantingi chu a In leh vel an tihfaisak bakah thing tuah tur thahnem tak an Phurhsak a, member 38 an thawkchhuak.

Kum 75 mi, Pi Langkhantingi hi a pasal nen Fa nei lovin an pa hian a boral san tawh a, hna a thawk thei tawh lova, a chhungkhat lainaten ei leh bar turte pawh an ngaihtuahsak thin a, sawrkar atanga In sak tanpuina a dawn hmanga In an sak sakah a mahin a khawsa mek a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## MIZORAM SAINIK DATA

Sainik Welfare and Resettlement chhinchhiah danin, Mizoram chhungah sipai bang 6355 an awm mek.

Mizoram Sainik Welfare and Resettlement hotute chuan Akashvani News Aizawl zawhna chhangin Mizoram chhunga Sipai bang ex-servicemen in ziaklut zat chu a vai a belkhawm 6355 an nih thu leh sipai bangin a an kawppui an boral san chu 2550 an awm thu an sawi a, hei bakah hian Indopui pahnihna a sipai a tang mi 7 an la awm thu an sawi baw.

Mizoram Sainik Welfare and Resettlement thawktute chhinchhiah danin Indopui II-na a an pasalte sipai tangin a boral san tawh hmeithai 222 bakah an pasalte an duty na hmun a boral ta hmeithai 10 an awm a, hei bakah hian sipai, Indona avanga ramtui lei lo mi 58 an awm baw.

<><><>

## REDUCE, REUSE, RECYCLE CENTER

UD&PA Swachh Bharat Mission hmalakna kal zelah, Aizawl Thakthing Venga bungrua leh thawmhnaw lakkhawmna leh semchhuahna hmun Reduce, Reuse and Recycle Center chuan hlut a hlawh sawt hle.

RRR Center enkawltuten Akashvani News Aizawl an hrilh danin kumin August ni 18 a he hmun an hawn tan atanaga December ni 13 thleng a bungraw lo lut chu 6616 a tling tawh a, heng bungraw lo lut zinga a chhuak tawh zat pawh 3575 a tlin tawh thu an sawi baw. RRR Center hi thawhtanni atanga inrinni pisa kal hun chhunga hawn thin a ni.

<><><>

## TOURISM MINISTER

Mizoram leh thenawm state Assam chu Tourism tih hmasawn kawnga thawhdun an remti a, hun remchangah thawhhona thuthlung an ziak ang.

Tourism Minister Pu Lalngthinglova Hmar chuan nimin khan Guwahati-ah Assam Tourism Minister Pu Ranjeet Kumar Dass a kawm a, inkawmna ah hian tourism hmasawna tura thawho an rem ti a, hun remchang hmasaah thawhona thuthlung ziah an tum a ni.

Pu Lalngthinglova Hmar chuan Mizoramin tun hnaiah tourist a neih tam thu leh, khualzin tam ber chu Assam state atanga lo zin an nih avangin Assam sorkar nena tourism hmasawna kawnga thawhona neih tul a tih thu a sawi chu Assam Tourism Minister chuan tha atih thu sawiin sawrkar mi pawimawh te nen an sawihonghal a, Mizoram chu Assam mipuiten an ngainat anih reng thin avangin tlawh chak tam tak an awm a ti a, rel luh hnuah mi thahnem zawk an awm zel a beisei thu a sawi bawk.

Pu Lalngthinglova Hmar chuan Tourism tih hmasawn kawngah Mizoram a thangharh mek tih sawiin thawhpui tha tak an mamawh a ti a, thenawm state Assam nena an thawh dun chuan rah tha a chhuah ngei a beisei tih sawiin Assam Tourism hunpuiah Mizoram tourism chawi larna tur thlalak leh video a remchan anga tilar ve thin turin a ngen a ni.

Inkawmnaa tel ve Assam Tourism Development Corporation Managing Director Kumar Padmapani Bora chuan Mizorama tour operator-te tan Guwahati lamah workshop an buatsaih theih thu te, Mizoramin ATDC kal tlanga tourism lama puih a tulnaah an inhawn reng thu a sawi a ni.

<><><>

PM to Jordan

Prime Minister Narendra Modi chuan naktuk atanga Thawhlejni thleng hian King Abdullah II bin Al Hussein sawmna angin Jordan ram a tlawh dawn. Jordan nena intlawh tawn na a neih hmasak ber tur a ni dawn a, ram pahnihte inkara thawhhona tur din a nih atanga kum 75 tlin na a ni chiah dawn bawk a. New Delhi leh Amman-te inkara thawhhona nghet tak a awm mek lai a ni. India chuan Jordan nen hian economic lama inzawmna nghet leh zau tak an nei a, India chu Jordan sumdawna lama thawhpui lian ber pathumna a ni. Ram pahnihte insumdawn tawna hi US dollar tluklehdingawn 2.8 vel a ni.

Ram pahnihte inbiakpawhna a tha hle a, Jordan Lal chuan Amman leh Mumbai inkarah direct flight a thlawh tir a, New Delhi-a service tihpun tum a . India rama khualzinte tan visa-on-arrival leh electronic visa facility a pe a, hei hian sumdawna leh tourism a ti awlsam zual hle a ni.

<><><>